

**Udruženje  
„Asocijacija studenata  
Fakulteta zdravstvenih studija”**

**S T A T U T  
Udruženja „Asocijacija studenata  
Fakulteta zdravstvenih studija”**

**Sarajevo, novembar 2020 godine**

Na osnovu čl. 12. i 18. Zakona o udruženjima i fondacijama („Službene novine Federacije Bosne i Hercegovine“, broj 45/02) Skupština Udruženja, na osnivačkoj sjednici održanoj dana 27.11.2020. godine u Sarajevu, donijela je:

## **STATUT**

### **Udruženja „Asocijacija studenata Fakulteta zdravstvenih studija”**

#### **I – OPĆE ODREDBE**

##### **Član 1.**

Udruženje „Asocijacija studenata Fakulteta zdravstvenih studija” (u daljem tekstu: Udruženje) je nevladina, neprofitna, nepolitička i nestranačka organizacija koju čine studenti Fakulteta zdravstvenih studija u Sarajevu (u daljem tekstu: Fakulteta).

##### **Član 2.**

Udruženje zastupa interese studenata svih 7 studijskih programa na Fakultetu. Ti studijski programi su:

1. Studij fizioterapije,
2. Studij radioloških tehnologija,
3. Studij laboratorijskih tehnologija,
4. Studij sanitarnog inženjerstva,
5. Studij zdravstvene njege.
6. Studij zdravstvenog nutricionizma i dijetetike,
7. Studij babičarstva/primateljstva;

### **Član 3.**

Ovaj Statut sadrži:

- naziv i sjedište Udruženja;
- ciljeve i djelatnost Udruženja;
- zastupanje i predstavljanje Udruženja;
- organe Udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da sazove Skupštinu;
- oblik i sadržaj pečata Udruženja;
- oblik i sadržaj znaka Udruženja;
- sticanje i raspolaganje imovinom;
- način donošenja financijskog izvještaja i izvještaja o radu;
- postupak za donošenje Statuta, izmjena i dopuna Statuta i drugih općih akata Udruženja;
- uvjete i način učlanjenja, prestanak članstva, kao i prava, dužnosti i odgovornost članova Udruženja;
- uvjete i postupak za pripajanje, razdvajanje, transformaciju ili prestanak rada Udruženja;
- pravila za raspodjelu preostale imovine u slučaju prestanka rada Udruženja;
- javnost rada Udruženja;
- završne odredbe;

## **II – NAZIV I SJEDIŠTE UDRUŽENJA**

### **Član 4.**

Puni naziv Udruženja je: Udruženje „Asocijacija studenata Fakulteta zdravstvenih studija”

Skraćeni naziv Udruženja je: Udruženje „ASFZS“

Sjedište Udruženja je: Ulica Stjepana Tomića 1, Sarajevo

Područje djelovanja Udruženja je Kanton Sarajevo

Udruženje će svojstvo pravnog lica steći danom upisa u Registar kod Ministarstva pravde i uprave Kantona Sarajevo.

### **III – CILJEVI I DJELATNOST UDRUŽENJA**

#### **Član 5.**

Ciljevi i djelatnosti Udruženja su:

- Kontinuirana briga o statusnim pitanjima studenata u vezi sa studijem,
- Udruženje brine o pravima studenata kao i o studentskom standardu,
- Afirmacija moralnih, naučnih, kulturnih i intelektualnih vrijednosti,
- Uključivanje studenata u evropske tokove života, prevazilazeći geografske i političke reorganizacije i ograničenja,
- Zalaganje za slobodu naučnog, nastavnog i obrazovnog procesa, te otvorenog dijaloga sa društvom,
- Uvođenje studenata u obrazovni proces, zatim u naučne i stručne projekte,
- Uspostavljanje međunarodne saradnje na naučno-stručnom, kulturno-zabavnom i sportskom nivou,
- Zastupanje i prezentovanje, prava i interesa studenata pred organima i tijelima Fakulteta zdravstvenih studija, Univerziteta i državnih institucija,
- Učešće u organizaciji tribina, javnih rasprava, seminara, konferencija i drugih kulturnih i obrazovnih manifestacija, značajnih za članove Udruženja,
- Učešće u aktivnostima na ostvarivanju optimalnih uslova socijalno-zdravstvenog i materijalnog statusa studenata, a sve u skladu sa Zakonom.

### **IV – ZASTUPANJE I PREDSTAVLJANJE UDRUŽENJA**

#### **Član 6.**

- (1) Ovlaštena lica za zastupanje i predstavljanje Udruženja su: predsjednik Udruženja koji je ujedno predsjednik Upravnog odbora Udruženja, potpredsjednik Udruženja koji je ujedno potpredsjednik Upravnog odbora Udruženja i generalni sekretar Udruženja. Lica za zastupanje i predstavljanje Udruženja zastupaju i predstavljaju Udruženje u zemlji i inostranstvu, prema fizičkim i stranim licima, bez ograničenja.
- (2) Mandat ovlaštenih lica za zastupanje i predstavljanje je 1 (jedna) godina, sa pravom reizbora, te isti mogu biti birani na istu funkciju najviše dva puta uzastopno.

**V – ORGANI UDRUŽENJA, NJIHOVE OVLAŠTI, NAČIN IMENOVANJA I OPOZIVA, TRAJANJE MANDATA, KVORUM I PRAVILA GLASANJA, UKLJUČUJUĆI I PITANJA O KOJIMA SE ODLUČUJE KVALIFICIRANOM VEĆINOM, FUNKCIJU LICA OVLAŠTENOG DA SAZOVE SKUPŠTINU**

**Član 7.**

Organi upravljanja Udruženja su;

- a) Skupština Udruženja,
- b) Upravni odbor Udruženja,
- c) Nadzorni odbor Udruženja.

**a) Skupština Udruženja**

**Član 8.**

Skupština Udruženja je najviši organ Udruženja. Rad skupštine je javan. Skupštini mogu prisustvovati i gosti, uz prethodno uredno uručen poziv od strane predsjednika Skupštine Udruženja.

**Član 9.**

- (1) Skupštinu čini 85 delegata.
- (2) Svaka godina studijskog programa (navednih u čl. 2. ovog Statuta) ima po 3 delegata, te drugi i treći ciklus studija jednog delegata.
- (3) Način izbora delegata Skupštine Udruženja, biće uređen Pravilnikom o radu Skupštine Udruženja.
- (4) Za rad Skupštine i punovažno odlučivanje na sjednici Skupštine potrebno je ostvariti kvorum Skupštine koji čini 43 delegata.

**Član 10.**

- (1) Odluke i drugi akti donose se natpolovičnom većinom prisutnih delegata na Skupštini, osim kod postupaka za pripajanje, razdvajanje, transformaciju ili prestanak rada Udruženja.
- (2) Delegati se izjašnjavaju za, protiv ili suzdržan, što se konstatuje zapisnički.
- (3) Skupština se sastaje najmanje jedanput godišnje.
- (4) Skupštinu saziva predsjednik Skupštine Udruženja.

- (5) U odsutnosti ili spriječenosti predsjednika Skupštine Udruženja, Skupštinu saziva jedno od lica ovlaštenih za zastupanje i predstavljanje Udruženja.
- (6) Prijedlog dnevnog reda, poziv i materijali dostavljaju se delegatima Skupštine najmanje pet dana prije održavanja Skupštine Udruženja, izuzev vanredne Skupštine koja se mora najaviti 48h prije održavanja.
- (7) Skupština Udruženja će imati Poslovnik o radu Skupštine, koji donosi Skupština Udruženja.
- (8) Poslovnikom o radu Skupštine Udruženja regulišu se razna unutrašnja pitanja i organizacije rada Skupštine Udruženja, kao i druga pitanja od značaja za efikasan rad Skupštine Udruženja.

### **Član 11.**

- (1) Redovna Skupština se saziva najmanje jednom godišnje i to u mjesecu novembru, ta Skupština je izorno-izvještajna.
- (2) Vanredna Skupština se organizuje po potrebi i to na zahtjev:
  - a) Upravnog odbora - ukoliko Upravni odbor odluči, da je potrebno sazvati Skupštinu, u svrhu odlučivanja o određenim akatima, te važnih pitanja o radu Udruženja, sa zahtjevom se javlja predsjedniku Skupštine Udruženja, koji zahtjev razmatra te nakon toga saziva ili ne istu,
  - b) Nadzornog odbora,
  - c) 1/3 potpisa delegata Skupštine Udruženja,
  - d) Nadležnog državnog organa.

Na Vanrednim zasjedanjima Skupštine moguće je odlučivati o reizboru, smjeni organa upravljanja Udruženja, te o izmjenama i dopunama Statuta kao krovnog akta.

- (3) Predsjednik Skupštine, može sazvati svečanu sjednicu Skupštine prilikom obilježavanja godišnjice Udruženja.
- (4) Sjednica Skupštine se može održati elektronskim putem u slučaju hitnosti ili ukoliko istu nije moguće organizovati na drugi način, što će se detaljnije urediti Poslovnikom o radu Skupštine.

### **Član 12.**

Skupština Udruženja, u okviru svojih nadležnosti:

- donosi Statut, izmjene i dopune Statuta, Poslovnik o radu Skupštine, Poslovnik o radu Upravnog odbora, Pravilnik o članstvu i druge akte Udruženja;
- daje saglasnost na pravne radnje poduzete u postupku osnivanja Udruženja,

- imenuje i razrješava sve članove organa upravljanja (Upravni odbor i Nadzorni odbor), predsjednika Skupštine Udruženja, ovlaštena lica za zastupanje i predstavljanje Udruženja, te predstavnike studenata u nastavno-naučnom vijeću Fakulteta,
- odlučuje o udruživanju u Saveze, pripajanju, razdvajanju, transformaciji, prestanku rada i drugim statusnim promjenama Udruženja,
- usvaja izvještaje koja je pripremio Upravni odbor Udruženja ili lica ovlaštena za zastupanje i predstavljanje,
- na prijedlog Upravnog odbora donosi Odluku o dodjeli priznanja Udruženja,
- Skupština razmatra i žalbe koje joj budu bile podnesene od strane članova Udruženja,
- odlučuje o svim pitanjima koja nisu u nadležnosti drugih organa.

### **Član 13.**

Mandat predsjednika Skupštine Udruženja traje 1 (jednu) godinu, sa pravom reizbora. Isti može biti biran na istu funkciju najviše dva puta uzastopno.

### **Član 14.**

Prava i dužnosti predsjednika Skupštine Udruženja su da:

- saziva sjednice Skupštine i rukovodi njenim radom,
- predlaže dnevni red Skupštine,
- potpisuje akte koje donosi Skupština,

### **Član 15.**

- (1) Skupština bira i razrješava predsjednika Skupštine. Izbor predsjednika Skupštine Udruženja, vrši se javnim glasanjem prisutnih na sjednici Skupštine.
- (2) Na listi za izbor može biti predloženo 1 ili više kandidata.
- (3) Izabran je onaj kandidat koji je dobio natpolovičnu većinu glasova prisutnih delegata na Skupštini Udruženja.

## **Član 16.**

- (1) Odlučivanje i glasanje na Skupštini je javno. Izuzetno, odlučivanje može biti tajno o čemu se prethodno izjašnjava Skupština Udruženja.
- (2) Na Skupštini se vodi zapisnik koji sadrži usvojeni dnevni red, diskusije, prijedloge i zaključke. Zapisnik vodi i potpisuje generealni sekretar , a potpisuje ga i predsjednik Skupštine Udruženja.
- (3) Ovjereni zapisnik se čuva u arhivi.
- (4) Uz zapisnik se prilažu svi materijali koji su na Skupštini razmatrani.
- (5) Zapisnik se uvodi u djelovodni protokol i sa materijalima se drži do naredne Skupštine, a zatim se odlaže u arhivu i čuva 10 (deset) godina.

### **b) Upravni odbor Udruženja**

## **Član 17.**

Skupština Udruženja imenuje i razrješava Upravni odbor Udruženja koji čini ukupno 11 (jedanaest) članova i to: predsjednik Upravnog odbora, potpredsjednik Upravnog odbora, generalni sekretar, 5 predstavnika stručnih tijela (Stručno tijelo za nastavni proces, naučni rad i režim studija; Stručno tijelo za standard i prava studenata; Stručno tijelo za kulturno-sportske djelatnosti; Stručno tijelo za međunarodnu saradnju i humanitarni rad; Stručno tijelo za marketing i odnose sa javnošću (PR) ), te 3 člana Upravnog odbora. Mandat članova Upravnog odbora traje 1 (jednu) godinu sa pravom reizbora. Isti mogu biti birani na istu funkciju najviše dva puta uzastopno.

## **Član 18.**

Kriteriji za izbor članova Upravnog odbora:

- da je član Udruženja,
- da uživa ugled u lokalnoj zajednici i članstvu,
- da poznaje svrhu, ciljeve, programe i potrebe Udruženja,
- da obavlja dobrovoljno neprofitni rad u vrijeme njegovog angažmana,
- da poštuje procedure u radu Upravnog odbora,
- da ima sposobnost za timski rad, te da pokazuje interes za edukaciju.



### **Član 19.**

- (1) Za svoj rad Upravni odbor je odgovoran Skupštini, kojoj podnosi godišnji izvještaj o radu i aktivnostima.
- (2) Upravni odbor će imati svoj Poslovnik o radu Upravnog odbora, koji donosi Skupština Udruženja.
- (3) Poslovnikom o radu Upravnog odbora Udruženja regulišu se razna unutrašnja pitanja i organizacije rada Upravnog odbora Udruženja, kao i druga pitanja od značaja za efikasan rad Upravnog odbora Udruženja.

### **Član 20.**

Upravni odbor vrši sljedeće poslove i zadatke:

- organizuje prijem članova Udruženja,
- priprema i predlaže nacrt izmjena Statuta i drugih akata koje donosi Skupština,
- priprema sjednice Skupštine,
- provodi politiku, zaključke i druge odluke koje donijela Skupština,
- upravlja imovinom i sredstvima Udruženja,
- ostvaruje saradnju sa nadležnim državnim organima i sredstvima javnog informisanja,
- donosi Odluku o troškovima za službena putovanja za potrebe Udruženja,
- imenuje komisije ili koordinateure kao pomoćna tijela za utvrđene zadatke iz njihovih nadležnosti,
- donosi dva (2) šestomjesečna Plana rada i aktivnosti za tekuću i narednu godinu,
- donosi finansijski plan za narednu godinu,
- imenuje studenta prodekana,
- podnosi godišnje ili periodične izvještaje o svom radu Skupštini na usvajanje,
- vrši i druge poslove određeno Statutom i poslove od interesa za Udruženje, koje nisu u nadležnosti Skupštine Udruženja.

### **Član 21.**

- (1) Upravni odbor donosi odluke na sjednicama koje saziva i kojima predsjedava predsjednik Upravnog odbora.
- (2) Upravni odbor može odlučivati ako je na sjednici prisutno najmanje šest članova, a odluke se donose natpolovičnom većinom prisutnih.
- (3) Član se izjašnjava za, protiv ili je uzdržan, što se konstatuje zapisnički

- (4) U slučaju hitnosti predsjednik Upravnog odbora može tražiti da se članovi Upravnog odbora o pojedinom pitanju izjasne putem elektronske sjednice, tj. online putem u slučaju nemogućnosti održavanja, što će se detaljnije urediti Poslovníkom o radu Upravnog odbora.
- (5) Rad članova Upravnog odbora je volonterski i za svoj rad ne primaju nikakvu nadoknadu, osim nadoknade za službeno putovanje.

### **Član 22.**

- (1) Predsjednika Upravnog odbora bira i razrješava Skupština Udruženja. On je po automatizmu predsjednik Udruženja.
- (2) Kandidat koji dobije natopolovičnu većinu glasova prisutnih delegata Skupštine postaje predsjednik Upravnog odbora.
- (3) Mandat predsjednika Upravnog odbora traje 1 (jednu) godinu, s pravom reizbora, te isti može biti biran na istu funkciju, najviše dva puta uzastopno. Mandat prestaje istekom, reizborom, smjenom ili ostavkom.

### **Član 23.**

Dužnosti predsjednika Upravnog odbora su da:

- 1) predstavlja i zastupa Udruženje;
- 2) saziva, organizuje i predsjedava Upravnim odborom, te predlaže dnevni red;
- 3) odgovoran je za primjenu Poslovníka o radu Upravnog odbora;
- 4) čuva pečat i ima ovlaštenje da ga koristi,
- 5) predlaže u ime Upravnog odbora program rada Udruženja;
- 6) između sjednica Upravnog odbora vodi poslovanje Udruženja;
- 7) podnosi obavezan izvještaj o radu Skupštini;
- 8) potpisuje akte koje donosi Upravni odbor i finasijsku dokumentaciju Udruženja;

### **Član 24.**

Ovlaštenja i dužnosti predsjednika Upravnog odbora u slučaju njegove spriječenosti, odsustva ili završetka studija prelaze bez ograničenja na potpredsjednika Upravnog odbora, koji je ujedno potpredsjednik Udruženja. Potpredsjednika Upravnog odbora bira i razrješava Skupština natpolovičnom većinom glasova pristunih delegata. Potpredsjednik Upravnog odbora je lice koje predstavlja i zastupa

Udruženje. Mandat potpredsjednika Upravnog odbora je jedna godina, sa pravom reizbora. Isti može biti biran na istu funkciju najviše dva puta uzastopno.

#### **Član 25.**

(1) Predsjednik Upravnog odbora može biti smijenjen sa funkcije, ukoliko ne ispunjava i ne podržava ciljeve i djelatnosti Udruženja.

(2) Predsjednika Upravnog odbora na prijedlog Nadzornog odbora ili 1/3 članova Udruženja smjenjuje Skupština nadpolovičnom većinom prisutnih na Skupštini Udruženja.

(3) U slučaju da predsjednik Upravnog odbora prestane vršiti svoju dužnost, sva ovlaštenja bez ograničenja prelaze na potpredsjednika Upravnog odbora, sve do izbora novog predsjednika Upravnog odbora Udruženja, a u roku od 30 dana od izvršene promjene.

#### **Član 26.**

Upravni odbor čini 5 predstavnika stručnih tijela i to:

1. Predstavnik stručnog tijela za nastavni proces, naučni rad i režim studija,
2. Predstavnik stručnog tijela za standard i prava studenata,
3. Predstavnik stručnog tijela za kulturno-sportske djelatnosti,
4. Predstavnik stručnog tijela za međunarodnu saradnju i humanitarni rad,
5. Predstavnik stručnog tijela za marketing i odnose sa javnošću (PR).

#### **Član 27.**

(1) Generalnog sekretara Udruženja koji je član Upravnog odbora, bira i razrješava Skupština Udruženja.

(2) Kandidat koji dobije natopolovičnu većinu glasova prisutnih delegata Skupštine postaje generalni sekretar.

(3) Generalni sekretar se bira na mandat u periodu od 1 (jedne) godine, sa pravom reizbora. Isti može biti biran na istu funkciju, najviše dva puta uzastopno.

## **Član 28.**

Obaveze i dužnosti generalnog sekretara su da:

- predstavlja i zastupa Udruženje;
- brine o svim administrativno-tehničkim poslovima Udruženja, kao i njenim finansijskim poslovima;
- vodi zapisnik na sjednicama Skupštine i Upravnog odbora;
- pomaže predsjedniku u radu i obavlja poslove koje mu predsjednik povjeri;
- da se stara o radu Udruženja;
- vodi djelovodni protokol i knjigu volonterskog rada;
- predstavlja i zastupa Udruženje prema svim fizičkim i pravnim licima;

Knjiga volonterskog rada predstavlja knjigu u kojoj se upisuje svaki sat volontiranja studenta pri raznim aktivnostima, projektima, akcijama i radnim djelatnostima Udruženja.

## **Član 29.**

Predsjedniku i članovima Upravnog odbora prestaje mandat i prije isteka vremena: uslijed smrti, ostavke, osudom na kaznu zatvora i opozivom. Opoziv podnosi Upravni odbor, a Odluku razmatra i eventualno potvrđuje Skupština na svojoj prvoj sjednici.

### **c) Nadzorni odbor Udruženja**

## **Član 30.**

Nadzorni odbor je kontrolno tijelo koje nadzire i prati rad svih tijela Udruženja, te finansijsko - materijalno poslovanje Udruženja

## **Član 31.**

- (1) Nadzorni odbor broji 5 (pet) članova.
- (2) Skupština bira Nadzorni odbor iz redova članova Udruženja na period od 1 (jedne) godine, sa mogućnošću reizbora.

### **Član 32.**

- (1) Skupština bira predsjednika Nadzornog odbora, natpolovičnom većinom broja prisutnih delegata, koji rukovodi i koordinira rad Nadzornog odbora.
- (2) Nadzorni odbor odluke donosi na svojim sjednicama, koje se održavaju po potrebi i to natpolovičnom većinom glasova prisutnih članova Nadzornog odbora.

### **Student prodekan**

### **Član 33.**

- 1) Studenta prodekana imenuje i razrješava Upravni odbor Udruženja, na prethodno raspisani konkurs na društvenim mrežama i oglasnoj ploči Udruženja.
- 2) Student prodekan ima mandat jednu godinu, sa pravom reizbora.
- 3) Djelovanje studenta prodekana Fakulteta, uređeno je Statutom Univerziteta u Sarajevu, u skladu sa članom 120. i 121.

### **Član 34.**

Obaveze studenta prodekana su da:

- 1) predlaže mjere za unapređenje studentskog standarda i prati stanje u toj oblasti;
- 2) da održava redovne sastanke sa studentima;
- 3) savjetuje i prima prigovore studenata koji se odnose na njihova prava i raspravlja o njima sa nadležnim organima Fakulteta;
- 4) prisustvuje sastancima Upravnog odbora, bez prava glasa;
- 5) obavlja i druge poslove koji se odnose na studentska pitanja, a koja mu naloži Upravni odbor Udruženja.

### **Član 35.**

Mandat studenta prodekana može biti i kraći od jedne (1) godine, ukoliko krši pravila i načela Udruženja.

## **Predstavnici studenta u nastavno-naučnom vijeću Fakulteta**

### **Član 36.**

Skupština bira i razrješava predstavnike studenata u nastavno-naučnom vijeću Fakulteta, natpolovičnom većinom glasova prisutnih delegata Skupštine.

Skupština bira 5 predstavnika studenata i to:

- Jedan predstavnik prvog ciklusa,
- Jedan predstavnik drugog ciklusa,
- Jedan predstavnik trećeg ciklusa,
- Jedan predstavnik vanrednih studenata,
- Jedan predstavnik studenata prve godine prvog ciklusa studija.

### **Član 37.**

- (1) Izabrani predstavnici su dužani prisustvovati sjednicama vijeća Fakulteta.
- (2) Predstavnici predstavljaju interese studenata, iznose svu problematiku sa kojom se studenti susreću, a sve u skladu sa odlukama Upravnog odbora Udruženja.
- (3) Mandat svih predstavnika studenata je jedna akademska godina, s pravom reizbora.
- (4) Isti mogu biti birani na istu funkciju najviše dva puta uzastopno.
- (5) Predstavnici mogu biti smijenjeni u slučaju nepoštovanja načela i propisa Udruženja.

## **VI - OBLIK I SADRŽAJ PEČATA UDRUŽENJA**

### **Član 38.**

- (1) Udruženje će imati pečat. Pečat Udruženja će biti okruglog oblika, promjera 4 cm. Unutar kruga će biti upisano: Udruženje „Asocijacija studenata Fakulteta zdravstvenih studija“, sa sjedištem Sarajevo i godinom osnivanja 2020., sve napisano na latinici. U pozadini će se nalaziti akademska kapa, kao simbol studentske populacije. Pečat će biti plave boje.

(2) Za čuvanje i upotrebu pečata odgovara predsjednik Udruženja.

## VII - OBLIK I SADRŽAJ ZNAKA UDRUŽENJA

### Član 39.

Udruženje će imati znak. Znak Udruženja će biti heraldičkog oblika (oblika štita), sa tamno plavim okvirom. Iznad samog znaka biće ispisano Udruženje “Asocijacija studenata Fakulteta zdravstvenih studija”. U vrhu znaka nalaziće se 7 (sedam) zvjezdica, koje simbolizuju sedam studijskih programa na Fakultetu, ispod će se nalaziti krug na kojem se nalazi akademska kapa, knjiga u kojoj se nalazi međunarodni znak zdravstva. Sve navedeno simboliše studentsku populaciju. U dnu znaka će biti napisano sjedište Sarajevo, sa godinom osnivanja 2020.



## VIII - STICANJE I RASPOLAGANJE IMOVINOM UDRUŽENJA

### Član 40.

Udruženje stiče sredstva od:

- priloga,
- donacija.,
- odobrenih projekata,

- poklona, a sve u skladu sa Zakonom i
- drugih izvora u skladu sa Zakonom.

#### **Član 41.**

Sredstva Udruženja mogu se u skladu sa zakonom trošiti za ostvarivanje ciljeva i djelatnosti Udruženja utvrđenim ovim Statutom, a prema finansijskom planu.

#### **Član 42.**

- (1) Sredstvima raspolaže Upravni odbor, na osnovu usvojenog finansijskog plana. Način raspolaganja sredstvima Upravni odbor će bliže regulisati Odlukama i Pravilnicima.
- (2) Udruženje je dužno da uredno vodi poslovne knjige u skladu sa općeprihvaćenim računovodstvenim primjenama i da se sastavlja finansijski izvještaj u skladu sa ovim i drugim relevantnim zakonima.
- (3) Organi upravljanja Udruženja, dužni su da upravljaju imovinom Udruženja, sa dužnom pažnjom i na odgovoran i zakonit način u najboljem interesu za Udruženje.
- (4) Upravni odbor Udruženja, je odgovoran za zakonsko korištenje sredstava.
- (5) Nadzor nad korištenjem sredstava, vrši nadzorni odbor, a izvještaji se dostavljaju Skupštini Udruženja, na razmatranje i eventualno usvajanje.
- (6) Članovi organa upravljanja Udruženja, imaju obavezu da sve finansijske transakcije Udruženja zaključuju po pravičnoj tržišnoj vrijednosti, odnosno prema uslovima koji su povoljni za Udruženje.

### **IX – NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU UDRUŽENJA**

#### **Član 43.**

Upravni odbor na kraju kalendarske godine priprema izvještaj o radu Udruženja i finansijski izvještaj koji prezentira Skupštini na razmatranje i eventualno usvajanje. Izvještaji se smatraju usvojenim kada se za njih izjasni najmanje (2/3) pristunih delegata na Skupštini Udruženja. Ukoliko se isti ne usvoji vratit će se Upravnom odboru na doradu i prezentovat će se na prvoj narednoj sjednici Skupštine.



## **X - POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA UDRUŽENJA**

### **Član 44.**

- (1) Kada se utvrdi da postoje opravdani razlozi, Skupštini Udruženja može se podnijeti zahtjev za donošenje novog Statuta ili izmjene i dopune postojećeg Statuta.
- (2) Inicijativu mogu podnijeti: 1) 1/3 delegata Udruženja, 2) Upravni odbor Udruženja.
- (3) Inicijativa se dostavlja predsjedniku Skupštine koji istu prezentira na prvoj sjednici Skupštine i ako je opravdana, dostavlja Upravnom odboru radi izrade prijedloga Statuta ili prijedloga izmjena i dopuna Statuta.

### **Član 45.**

Utvrđene prijedloge Upravni odbor dostavlja Skupštini Udruženja na razmatranje i eventualno usvajanje. Prijedlozi su usvojeni ako je za njih glasalo najmanje (2/3) delegata na Skupštini Udruženja.

## **XI - UVJETI I NAČIN UČLANJENJA, PRESTANAK ČLANSTVA, KAO I PRAVA, DUŽNOSTI I ODGOVORNOST ČLANOVA UDRUŽENJA**

### **Član 46.**

- (1) Udruženje će imati Pravilnik o članstvu, kojim će se detaljnije definiše prijem i isključenje članova Udruženja, kao i ostala pitanja u vezi sa članstva u Udruženju.
- (2) Udruženje ima redovne i počasne članove.
- (3) Članstvo u Udruženju stiče svaki student upisan na Fakultetu.
- (4) Članstvo u Udruženju traje dok osoba ima status studenta.
- (5) Članstvo u Udruženju: prestaje završetkom Fakulteta, odlukom Skupštine Udruženja i u drugim slučajevima što će se definisati Pravilnikom o članstvu.

- (6) Članovi Udruženja mogu biti svi studenti, bez obzira na spol, etničku i rasnu pripadnost, materijalni status, godinu studija, studijski program, status studiranja (redovan ili vanredan).
- (7) Članovima Udruženja zagantovana je sloboda mišljenja i izražavanja u okviru Udruženja.

#### **Član 47.**

- (1) Počasni članovi Udruženja mogu postati studenti i nastavnici (kao i akademsko osoblje Fakulteta) iz zemlje, i inostranstva koji svojim radom, djelatnošću i materijalno-tehničkom pomoći doprinose ostvarenju programskih ciljeva i djelatnosti Udruženja.
- (2) Počasne članove bira Skupština Udruženja, na prijedlog Upravnog odbora Udruženja.
- (3) Počasni članovi nemaju pravo odlučivanja, niti pravo da budu birani u organe upravljanja Udruženja.
- (4) Ne postoji mandat počasnog člana.

#### **Član 48.**

Prava, dužnosti i odgovornosti članova Udruženja su:

- Da učestvuju u radu svih organa upravljanja Udruženja,
- Da budu imenovani u organe upravljanja Udruženja,
- Da daju inicijative, mišljenja, sugestije i prijedloge u vezi sa aktivnostima svih organa upravljanja Udruženja,
- Da daju aktivan doprinos o ostvarivanju ciljeva i djelatnosti Udruženja,
- Da čuvaju i jačaju ugled Udruženja,
- Da svoj rad u Udruženju obavljaju transparentno i savjesno.

Ukoliko članovi Udruženja ne postupaju po navedenim dužnostima i odgovornostima, mogu biti isključeni iz Udruženja.

## **XII – UVJETI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA UDRUŽENJA**

#### **Član 49.**

- (1) Udruženje se može udruživati u:
  - Savez Udruženja studenata,
  - Ali i sa drugim Udruženjima i nevladinim organizacijama.

(2) Udruženje se može pripojiti drugom udruženju ili drugoj nevladinoj organizaciji, može se transformisati u drugi oblik, može prestati sa radom o čemu Skupština donosi odluku na koji način će se regulisati imovina Udruženja.

#### **Član 50.**

Udruženje može biti član raznih NVO mreža, asocijacija od lokalnog do međunarodnog nivoa.

#### **Član 51.**

Odluku o pripajanju, razdvajanju ili transformaciji, donosi Skupština (2/3) većinom ukupnog broja delegata Udruženja.

#### **Član 52.**

Udruženje može prestati sa radom u skladu sa odredbama Zakona o udruženjima i fondacijama FBiH, ili kada Skupština Udruženja dvotrećinskom većinom (2/3) ukupnog broja delegata donese odluku o prestanku rada Udruženja.

### **XIII - PRAVILA ZA RASPODJELU PREOSTALE IMOVINE U SLUČAJU PRESTANKA RADA UDRUŽENJA**

#### **Član 53.**

U slučaju prestanka sa radom Udruženja i njegovog raspuštanja, nakon izmirenja obaveza, skupštinskom odlukom utvrdiće se kome pripada preostala imovina i sredstva. Suprotno tome, imovina i sredstva pripadaju registrovanom Udruženju od javnog interesa koje ima iste ili slične ciljeve i djelatnosti u skladu sa članom 46. Zakona o udruženjima i fondacijama Federacije Bosne i Hercegovine.

Odluka o raspodjeli preostale imovine u slučaju prestanka rada Udruženja, se donosi na Skupštini Udruženja dvotrećinskom većinom (2/3) ukupnog broja delegata.

#### **XIV - JAVNOST RADA UDRUŽENJA**

##### **Član 54.**

Rad Udruženja je javan.

Javnost rada Udruženja se ostvaruje transparentnim istupima u javnosti i preko društvenih mreža.

Za davanje informacija o radu Udruženja ovlašten je predsjednik Udruženja i predstavnik stručnog tijela za marketing i odnose sa javnošću (PR).

#### **XV – ZAVRŠNE ODREDBE**

##### **Član 55.**

Tumačenje ovog statuta daje skupština Udruženja.

##### **Član 56.**

Statut Udruženja stupa na snagu danom donošenja na sjednici osnivačke Skupštine Udruženja.

Statut će se primjenjivat od dana upisa u Registar udruženja koji se vodi kod nadležnog Ministarstva pravde i uprave Kantona Sarajevo.

*Sarajevo, 27.11.2020.*

**PREDSJEDNIK SKUPŠTINE UDRUŽENJA**

---

**Sarah Aranautović**